



增定廬山志卷三

淮南李 澄鏡月編輯

北平吳 煒燦叟重訂 上谷金 巽方籀

參閱

關中杜恒焞方

山川分紀二

大林峯卧龍菴銀臺上大林寺

推車嶺東北為大林峯

桑疏大林峯者晉慧遠時曇詵法師於講經臺東南

雜植花木鬱然成林故名大林又名雲頂峯

羅漢池在峯西舊志云近佛手岩又志云峯有新蘿岩飯牛池雞冠石今不知所在

續志白蓮池卽羅漢池池在寺後峯之巔清泚如鑑凹引而西流

大林峯之西有卧龍菴

桑疏卧龍菴卽水口菴水口者大林峯前諸水所由以趨於錦澗橋者也硤石詭壯水淙淙然菴處其徼亦勝地云

石劄卧龍菴三大字

續志水口石生和尚所住處

增
釋圓悟遊記石隱菴在水口石生禪者山居前佛手岩後大林寺菴之左右竹樹香密路俯石岩而進石臺三四高出層巒其左峯疊石千丈餘其下奔流滾滾石臺上皆細草霜花老人坐石臺茶話謂之茶話石

增
閻爾梅夜宿水口詩萬水奔岩際千峰竇一唇半天聞鼓吹飛雪走星辰石坎都無底松聲若有輪浮來花片片泥作錦橋茵

增 熊文舉水口詩橫堆怪石接天齊覓徑扶筇措步述
乍怖九關嚴虎豹亦如三峽少猿啼披襟側目煙霞
亂亘古窮荒草樹萋獨上訪仙亭縹緲西風丹葉另
成蹊

增 葉榮石隱菴贈僧師每詩草床蔬食足眠餐遶屋松
聲六月寒幾度雨餘風靜後石頭高踞聽鳴湍

增 潘之恒石隱菴記癸巳歲遊廬山過大林寺婆娑寶
樹下恨無奇窟可探舊聞卧龍菴居谷口峽石詭壯
水淙淙激響過錦澗橋見隱隱青林知別有世界恍

若得之臆中時少導師遂恡此緣後此二十七年爲
已未歲遇石生若公詢所棲有卧龍菴居址卧龍者
明禪師輝公隱處開府何公目之曰此真卧龍居也
樹竹生石罅中皆太古以上物然亦得之近夫邈其
初也晉太元初慧永法師同遠公依安禪師居廬山
棲此谷中逾十七年時從峰頂別立茅室禪思久之
諸學徒至其室常聞異香故稱香谷後從此出居西
林與遠公分林主教三十年影不出山並擅標譽鎮
南將軍何無忌節制潯陽祈詣謁候兩著高風而猶

賞永公清散多於遠公則開府鎮南與永輝兩師豈
非前後身耶若公雖江上居其氣倒三峽而吞七澤
禪思詩理俱造玄妙出之奇窟而託二隱爲深藏未
有窺其際者又常語予谷中一巨壑爲雙水所滙其
左自大林來超巒越洞鳴瀨咽波若走虬飛鷲與怪
石爭怒號躍顙跳梁不遑寧止俱歸依於座下題曰
石隱菴從錦澗橋望之若置危岑上近復構靜室於
菴後數百步楚楚五楹復題曰石生隱夾道古松數
百章視石隱更爲幽寂而絕頂白蓮山有池種藕其
間歲發華數十莖池水湫流至石生隱左隙溢出又
穿竹樹過石隱香積以待汲者而復會於錦澗橋此
又山水之最奇峭者也予嘗誦陸士衡張孟陽左太
冲詩諷託皆遠朗吟一過屬若公作招隱堂以四詩
揭於壁間今若公二隱其意先與此合予不能無感
於心因訂盟偕隱以慰廬山香谷之思云

大林峯西南有銀臺菴

桑疏銀臺菴在卧龍菴東擲筆峯北麓

大林峯南有上大林寺寺前有寶樹二株其名僧曰遯

禪師曰登師

桑疏上大林者晉僧曇詵建後兵燬明宣德中僧慧
寃復建成化中僧圓泰修山顛諸刹此爲最古云有
何遷風泉雲壑四大字扁

續志寶樹二株在寺西南亭亭如車蓋娑羅木也往
西域僧自其土攜之來以植於此嘉靖中其一附幹
生一花如蓮花大如盤色蒼翠如其樹色**唐安西道**
進娑羅木枝二百莖狀木有娑羅特爲奇絕不庇凡
草不止惡禽聳幹無慚於松栝成陰不愧於桃李**續**

志寶樹曇詵師手植

石刻大林寺三大字在寺南石上

神僧傳登師者不知何許人誦法華經晝夜不息常
清夜說戒相三歸依忽口吻放大光明照耀四衆四
衆競拜喧闕師不語光亦旋斂師曰本欲受戒那得
見光喧闕光見乃受戒之祥非得戒正緣今更從初
衆默然師又說法還復放光衆又喧闕遂辭去

白居易遊大林寺序予與河南元集虛范陽張允中
南陽張深之廣平宋郁安定梁必復范陽張時東林

廬山志 卷三 五 日思堂
寺沙門法演智滿中堅利辨道深道建神照雲臯息
慈寂然凡十七人自遺愛草堂歷東西二林抵化城
憇峯頂登香爐峯宿大林寺大林窮遠人跡罕到環
寺多清流蒼石短松瘦竹寺中惟板屋木器其僧皆
海東人山高地深時節絕晚於時孟夏如正二月天
山桃始花澗草猶短人物風候與平地聚落不同初
到恍然若別造一世界者因成口號絕云人間四月
芳菲盡山寺桃花始盛開長恨春歸無覓處不知轉
入此中來既而周覽屋壁見蕭郎中存魏郎中弘簡

李補闕渤三人姓名文句因與集虛輩嘆且曰吁此
地實匡廬間第一境由驛路至山門曾無半日程自
蕭魏李遊迨今垂二十年寂寥無繼來者嗟乎名利
之誘人也如此元和十二年四月九日太原白樂天
序

增 釋靈一自大林與韓明府歸郭中精舍作野客同舟
楫相攜復一歸孤雲生暮景遠岫帶春暉不道還山
是誰云向郭非禪門有通隱喧寂共忘機

增 周元公敦頤大林寺詩三月僧房暖林花互照明路

盤層頂上人在半空行水色雲含白禽聲谷應清天
風拂襟袂縹緲覺身輕 分程無暇日暫得宿清幽
始覺空門客不生浮世愁溫泉喧古洞晚磬度危樓
徹曉都忘寐心疑在沃洲

增

王慎中由大林寺尋講經臺循香爐峰側下山千尺
飛蘿手自援鳴泉處處弄潺湲半峰棲霧逢僧濕絕
徑穿雲見虎閒岸幘正宜岩石上褰衣時傍竹林間
夕陽翠巘看尤好去路心知是下山

增

袁宏道大林寺寶樹詩 錢幹銅膚四十圍隔峰猶自
望孫枝塗雲抹日空山裏曾見東林行道時 瘦石
鱗鱗帶碧絲百盤無地不青枝人間那得西方種問
取嘉州合眼師

增

閻爾梅自大林過講經臺詩 香山花逕石煙寒寶樹
新晴露葉丹轉到遠公臺上去鎖江樓外一拳看

增

朱徽上大林裝羅寶樹詩 古幹高千尺虬枝絡萬層
嘯風玄鶴舞胷雪白猿騰老過後凋栢陰留不化冰
只疑芳樹下猶有海東僧

增

釋溥淳大林花塢詩 杜鵑花發杜鵑啼初夏爭看一

運齊蝶夢莫教輕出谷人間桃李已成谿

增

王世懋遊匡廬記寶樹在上大林寺去天池輿行可

四里而遙幾及山麓矣樹有二其亭亭道傍扶疏四
垂妙好端正若浮屠所畫瓔珞琪樹者相傳一異僧
自西土移來近忽出一瘦作人狀僧輩以爲大士像
云其一生澗傍枝葉覆蔭根生石間泉灑灑流其上
樹之美故讓道傍者而所據勝不啻過之度澗而北
爲寺之故燬於野火僧募復之外設籬落內爲板屋
雖樸若村居入其堂與如也

桑疏大林峰北下卽講經臺語具東林寺類中

大林峰之東北香爐峰之後山也其北爲香爐峰其南
多靜者居

大林南水出錦繡谷趨錦澗橋

擲筆峰白雲菴赤脚塔將軍山神龍宮

大林峰之南爲擲筆峰

桑疏擲筆峰在牯牛嶺西北峰巔有石卓立如筆故
名

十八高賢傳慧遠制涅槃經疏疏成而擲其筆筆卓

立虛空中不墮故名

擲筆之西有法堂菴

桑疏法堂菴當擲筆峰脊所處獨高可俯視山巔諸刹

擲筆之南有彌陀菴

桑疏彌陀菴俗謂之火場在擲筆峰南下邃谷中菴極幽邃山峻水清奧如曠如有何遷擲筆菴扁其地故戒壇也**石劄**戒壇二大字**釋圓信遊記**火場昔年煉魔之地葛寅亮改名火蓮院

桑疏廬山每靜夜無風時四山山壑中有聲泠泠可聽蓋山籟也又忽時有大聲砰訇莫測所從來

增**李萬寶**火蓮院贈古拙上人詩高僧獨坐擲筆峰手携玉塵揮蒼龍夜半禪關望南海千山初日青曠曠

增**崔掄**奇火蓮院詩擲筆峰前一徑餘戒壇自古結精廬青蓮香處佛敷座石火光中僧著書夜聽泉聲來枕上曉看松影逼窗虛更過嶺外蘆花寺傳是匡君舊隱居

擲筆之東南爲長衝

桑疏長衝在彌陀菴迤東牯牛嶺下長衝者長且平
可藝粟數十百石有泉數十泓石門澗水之源也
擲筆之西南爲白雲山其陽有白雲菴又西南爲赤脚
塔山其陽有赤脚塔

桑疏赤脚塔在白雲菴西其僧卽天眼尊者周顛仙
人所使進藥於太祖者也姓沈名覺顯湖口人行業
莫可攷九府新志湖口縣志乃曰覺顯蓋常師事周
顛云顯之卒也太祖特賜葬塔以白石後火乃易以
鐵上有御製二字金塗之

增

黃克晦祖塔緘封寺詩古木喧群鳥幽泉洗碧空頻
來眺寂寞舊室喜從容羽蛻封殘草靈書獲斷虹斯
人如可作還足慰宸衷

增

釋戒顯赤脚祖塔詩仙臺不可見丹愈幻人寰赤脚
醫天子白頭歸舊山吐炎鎔蛻骨賜葬寵雲關鍊塔
千年在霞峰日月間

長衝之水逕彌陀菴出鐵船之東爲石門礮
擲筆又西南有小山曰將軍其西有神龍宮

桑疏神龍宮在將軍西下窺谷中南邇九奇北距天

池岩石幽邃宮左有大壑以受長衝九奇諸水

曰龍潭在宮左大壑中其潭神龍時來居之來則雲

合湧水洗潭

清涼石在宮北道傍石刻文殊攝化神龍之宮八大

字天池二大字

赧封寺黃龍寺

赤脚塔前為赧封寺

續志赧封寺即林隱院明僧智素號靜菴建僧嗣法於雲溪智瑛有語錄傳世柳邦傑林隱語錄序釋之

教以參禪為第一義禪之學以寂為體以悟為用而通焉變焉無窒礙焉斯其至矣若夫坐木牀飯糗草演經文特其粗跡焉耳靜菴和尚名智素山東濰邑人蚤年因怙恃既歿即有飄然之志年十五始入五臺師事天成寺僧大用其次入終南入伏牛罔不苦盡厥心三載至廬山以雲溪禪師為師溪名智瑛少壯苦不識字迄八十有餘信口成句頗協音韻以故沙門多宗之而靜菴乃其高弟也雲溪卒靜菴之教益行正德初結廬於赤脚祖塔之側四方遊衲參禮

殆無虛日其間篤信者必求偈語一章而服膺之日
累月積不覺成帙靜菴門徒大覺刻梓成書而請序
於予予惟儒者之道合內外兼費隱包大小而其要
歸實不出乎人倫日用之外其於禪也終柄鑿之不
相入而吾有取於靜菴者蓋因其曠寂之心久而愈
篤苦潔之行老而弗渝其視奔趨於利祿者有間矣
若夫所彙之言惟得於禪者知之

續志寺一名霞峰寺鄒元標題扁有廬山高處四字
踰赤脚塔山東南行三數里渡溪松杉蒙密處是爲黃

龍寺寺內有藏經閣

續志黃龍寺明釋了堂號徹空手闢寺踞廬山之中
以黃龍潭得名萬山環抱松杉碧遶後枕玉屏峰前
有天王峰相峙其西爲御碑亭亭下爲大溪溪中有
輿龍橋橋西南數武有洞曰制龍洞洞上有大磐石
曰降龍石龍池在焉寺東徑旁石壁間劖尺五天三
大字天台王士昌書寺中毘盧閣釋湛如建桐城吳
中丞用先爲造滲金毘盧像遶殿應真大士銅像精
巧奇麗閣中龍藏錦袱牙籤方面莊整出明神宗母

慈聖皇太后所賜達觀大師爲徹空講者又有太后所賜羅漢十八軸元至正時筆精雅生動絹亦細潤異近代募僧普意書名幅內新安潘之恒有毘盧佛閣記

增明神宗護藏勅皇帝勅諭黃龍寺住持及僧衆人等朕惟佛氏之教具在經典用以化導善類覺悟迷群於護國佑民不爲無助茲者聖母慈聖宣文明肅皇太后命工刊印續入藏經四十一函并舊刻藏經六百三十七函通行頒布本寺爾等務須莊嚴持誦尊

奉珍藏不許諸色人等故行褻玩致有遺失損壞特賜護持以垂永久欽哉故諭萬曆十四年三月日年月上有廣運之寶

增明神宗新刊續入藏經序續入藏經四十一函起華

嚴玄談會玄記至第一希有大功德經計四百一十卷此我聖母慈聖宣文明肅皇太后所命刻也朕惟釋教東流經典遍譯函卷繁富極矣我聖母躬體聖善坐撫昇平密契心乘力修聖果因復假筏迷津施航覺海續增茲典聿廣義宗德意甚盛載惟經世出

世厥用曼殊然其立教以明心見性爲宗以慈悲喜
捨爲用以嗔愛媼殺爲戒以戒定禪寂爲門大都使
人破塵妄之迷以印妙圓之體惕罪報之由以修慈
善之根悟未來之因以減現在之業此其覺人濟物
勝殘去殺之功於吾聖治不爲無助故經謂莊嚴施
捨周於沙界不若一經一偈流布之功然則聖母慈
命真可謂續慧燄於昏衢普慈雲於陰界延佑宗社
種福人天不可思議者矣若乃梁魏隋唐之主傾國
資以崇像飾瘠齊民以奉緇流殊矣釋氏本旨朕所

不取亦非我聖母流布是經之意是爲序 年月同
前寺內有馮夢禎龍藏碑

增 王士昌宿黃龍寺詩 招提清漢上殘夜度疎鐘窗月
空虛白龕燈黯淡紅喬林棲靜鳥小砌鬪吟蟲被冷
分禪衲松杉半嶺風

增 張程黃龍潭詩 言尋黃龍潭暝坐潭上石見潭不見
龍潭空性亦寂層雲盪心胸天風悚毛骨相對了無
言僕夫催行役

增 釋真可寓黃龍寺寄賓陽老宿 一菴高結翠微間千

尺飛泉萬仞山月夜爲誰歌白雪遙聞清響落塵寰
增釋智明再過黃龍潭詩再來修竹下倚杖聽春禽雲
冷石潭淨花明草閣深浩歌傾白日危坐惜清陰不
厭山行遠還知幽可尋

增朱徽觀三疊泉爲霧雨所阻過黃龍寺詩將辭五峰
去言訪三疊泉不應風雨妬慳我霎時緣山北行
將遍山南已在眼凌空若有待日暮不知返夜從
孤峰下四顧迷歸路遙聞鐘磬聲正在松深處李
公好奇人失足墮蒼耳今吾有此行庶幾無愧矣

深山無履跡遶門長綠苔不知僧定後雲裏有人來
朝行白雲裏暮宿青峰巔岩際疑無地洞中別有
天

增朱徽黃龍寺晤僧從一話舊詩寶藏經樓覆大千支

提峰北玉屏前鍾陵出定歸山後宴坐於今二十年

僧舊住
進賢

增朱徽示黃龍寺行者智覺詩掌裏有珠胡漢見石中

生火海桑枯白頭不免饑寒役看汝居然是丈夫智覺

舊爲
余僕

增黃虞佐宿黃龍寺詩丹嶂開初地黃龍記舊聞高松
微漏日傑閣半支雲禪榻溪聲滿山齋菜甲分還憑
法輪力浩劫賁螭文

增閔麟嗣黃龍寺詩萬木亂參天孤峰對鐵船客因看
畫至寺以伏龍傳寶笈悲前代蒲團坐小年松花吹
不定半落講堂邊

增王思任遊記王赤城題尺五天處踰數嶺山肉忽黃
予正訝絕下一坡種杉萬計綠雨疎風撥天無尺也
有僧卜地鹿爲引至名鹿野改爲黃龍潭規製從木

閣度殿僧律嚴山木不得折一枝折之必訟至枝長
而後已以故叢林茂密予過其嶺徘徊不忍去是風
氣之所鍾也天池東林俱逆關苞之廬龍面發者歸
宗爲大背發者黃龍潭爲正請存斯目

增潘之恒石林社記畧石林舊在虎溪東與黃龍潭相
近初潭之爲龍居也孤月禪師制之徹空大師馴之
後龍之種化爲群蛟復起爲災師又擊鐘伏之而後
建爲黃龍寺於時慈山至五乳若昧至開先石生復
香谷畢貫之開石門澗并茲社而七遠公有言白蓮

重開是社再興時今池皆污邪不藕而花者數處所
 屈指者不難有遠持而難有永不難有康樂而難有
 靖節不難有竹林而難有石林不難者名而難者行
 不難者信而難者才不難者幻而難者真吾願求其
 人以為斯社重社有七其人則同余所知者慈山清
 大師若昧石生師徒司成湯公賓尹叅知曹公學督學
 葛公寅亮黃公汝享開府汪公可受吳公用先王公士昌儀制曾
 公鳳儀都諫鄒公元標羅公大紘陳公維春太史李公光元居士
 邢君懋學鄒君匡明畢君成珪余得附其後

增釋定髡黃龍金竹仰天三刹記匡廬古刹百計皆晉

以來高僧之所剏建盃載山乘歷明有黃龍金竹仰
 天三刹蓋得三人焉曰徹空堂曰恭乾敬曰敬堂忠
 徹空名了堂潛山鄭氏子自幼穎異七歲出家言行
 不苟初求安心法不得一夕夢神授以首楞嚴覺取
 讀至汝身汝心咸是妙明真精妙心中所現物恍然
 氷釋遊望江隱居香茗山不語三載去之匡廬謁孤
 月禪師印証玄解與濱陽性空諸老檢藏天池督學
 敬所王公入山訪師指經問曰此何物堂曰閒家具

公曰何用堂曰以消閒耳公大悅命衆優禮遂卜居山之黃龍潭潭當匡廬之正中繇是十方雲水得憇單焉恭乾名仁敬襄陽吳氏子髫年有出世志於伏牛山福田寺禮高庵法師祝髮受具聽講經論窮叅性相宗旨日夜無怠者三載於教觀深有信受師曰學者志宜遠大無自足也遂囑公如京都若東園暹理諸大法師公依講肆盡得其奧義大章宗師開建達磨之單旨於少林公盡棄教乘依棲十餘年入室大有契悟遂棄去之伏牛煉魔場大爐鞴中放捨身

心打長七者三年隨遍叅知識以求印証道過金陵有守心禪師隱居弘濟一見大奇之乃謂公曰道在心悟守在靜密其於登山涉水徒費草鞋錢耳乃留公閉關相與切磋日造深奧如是者三年及破關卽判然入匡廬將結茅終身時萬曆七年己卯歲也公初入山下地至金竹坪見其平衍嘆曰此五百人安居處也遂構宇焉上足續芳嗣其傳而廣之僧垂萬指是爲千佛寺敬堂名法忠本歛人姓曹氏年十九禮杭之靈隱大機和尚爲弟子執爨三年思大事未

了遂依講席聽諸經猶以文字爲障礙乃渡江之少林依大千和尚究安心法居十載多所發明尋之京師復禮遍融諸大老印決心要遊五臺走伏牛而轉廬阜初結庵於講經臺居三年以來往爲煩乃遷五老峯又四年偶至仰天坪愛其高絕誅茆縛椽以居之未幾而四方歸者日益至乃建殿一所禪堂五楹師脫形骸無爾我親行乞以供衆居二十三年遂成叢林楞曰雲中志最高也三寺之興蓋得諸三師是爲記

金竹坪

黃龍山南金竹坪一名千佛寺

續志將軍河東上爲金竹坪千佛寺在焉背枕九奇面對鐵船廬山之頂峰巒四圍如蓮花藥此居其中最爲深穩按古寺此名九奇明萬曆七年有僧仁敬號恭乾始開基焉其徒智聯號續芳增其式廓遂成巨刹聚僧垂萬指皇太后遣使致香送滲金佛像奉安藏堂旋以續行高古賜紫寵之後荆國主復建大雄寶殿鉅麗甲山南北旁有老杉修篁交蔭又古松

一株短小盤屈異於常植

增
[新志]恭乾法師飯蔬飲水此地者三載乃應五祖寺法華期復赴興國大叅吳國倫期已與南昌少宰鄧以讚互相倡導成此勝事

增
[王思任遊記]金竹坪道場新建匡山接衆處有活潑泉竄至僧厨極甘冽寺外一樹白花四瓣幽香趁人問爲何名僧不識也

寺東爲支提峰雲屏峰寺傍有雲會泉

[續志]支提峰明瑞桂二國主建六和塔於其上吉水

修撰劉同升新城儀部黃端伯撰文立石焉

[續志]雲屏峰下有二池四時不竭相傳許旌陽鍊丹之處也與雲屏比肩者爲萬籜嶺

[續志]其泉初本無水偶一僧持咒經行夜見松下白雲布地久而不散近之渾沸騰響以杖卓之泉乃出寺內有藏經閣楚天閣護松亭

[續志]藏經北板方冊整嚴供具甚麗閩中少叅曹學佺扁曰深竹經聲楚天閣王思任題額極目千里長江如練登臨之美不可狀護松亭在大雄殿側蒼松

蟠頂如蓋馮時可蔡毅中書額

增
蔡毅中金竹坪詩 細細爐煙飛冉冉山雲霽萬竹動
秋聲金花滿幽砌 散步出林臯草莽生屏翳山僧
莫漫除恐有草中蕙 樹頭摘松子澗底採芙蓉風
生花氣來一飽出殼封 高屏一日風暮雨鳴天竹
西風送雨聲商意滿林麓

增
釋今覲金竹坪詩 情與廬山冥幽思無動定適爾前
峰遊渺然絕意境洞壑寂無聲松杉微有徑疎籬綠
槿齊密竹朱門映古殿拂長松虛堂閒落景山川理

本奇緣會趣自永久坐發微吟明月粲東嶺

金竹坪西南下大壑中有溪曰將軍河其中多靜室

續志將軍事無可攷或曰有峰名將軍亦以名溪

增
王思任遊記 沈石田畫有豆青石坂人行泉上余極

愛之至將軍河恰似一石架大磐上又數雄石乳石
激發湍瀉中旋銀舞玉輪帛捲綃妙難形至

將軍山南爲青林山青林之南上爲靜業堂西南上爲
般若菴以通山之西道也

九奇峰上霄峰仰天坪

將軍山之南有九奇峰

九江府志天池寺有九奇峰蓋總廬山諸峰而有九云

桑疏九奇峰者東起自含鄱嶺而西放乎上霄峰連山嵯峨角立爭雄長其奇者九故云九奇俗謂之火炤山也上霄峰含鄱嶺別有類

增王思任遊記盼雲峰寺始登趾丹嶂萬仞一呼吸黑雲幔盡急輿至解衣僧不內給宿九奇菴蔭綠幽蒙穿枝撥翠雨浙浙入矣得吏人送酒王僧稍恬萬聲

齊下夢至瀟湘不知是風是谿是雨

增黎元寬九奇峰寄釋匡雲詩飄風應不到匡廬卧起匡公走訊子爲問九峰峰頂上可容勞苦試騎驢

增閻爾梅九奇峰詩峰餘山外壓空煙上視曾無北半天絕頂石頭風欲墜老僧菴在樹梢懸峭壁傾崖杖履艱石紋花似豹皮斑老僧移得林泉動一筓南山到北山

增陳弘緒懷釋匡雲詩誰穩青山卧家家雲水蹤獨餘峰頂上長倚石邊松闢茗春還幾餐薇客屢逢縱空

諸所有閒晝歎聲重

增
陳允衡泊舟匡山之麓寄九奇峰匡雲長老片牒指
煙樹湖波拂空渺殘月明孤城斜風下飛鳥客心方
靡靡岳色自皎皎幽期坐荏苒微軀涉紛擾爲問九
奇峰松門一何窄

續志明天啓中有釋性淳號匡雲於天池北障縣岩
結宇鑿石爲門羅室之峰而有九故易名焉時人皆
呼天池北障爲九奇峰也

九奇峰水分數道北下與長衝諸水合而出石門

九奇峰西南有峰奇秀者上霄峰也

桑疏九奇峰連延而西中斷復起二峰尖秀如蒼玉
筍是爲上霄峰實九奇西第一峰也鉅麗乃高於九
奇峰石門礮道中見上霄縹緲微露其巔於諸峰上
益轉而西南寢近弔橋口上霄之奇始益可見天池
蓋僅覩其背云

舊志秦始皇漢武帝司馬子長皆嘗登上霄

一統志上有石梁石室瀑布禹刻秦始皇漢武帝石
刻今竝亡之

周景式廬山記登廬山望九江以觀禹功其茲峰乎
東南隱諸嶺不得駢矚自廬山人迹所暨迴望處無
復出此者又甚高峻每雨其下成潦而上有皎日峰
頭有大磐石可坐數百人

孫應鰲詩海外仙人不可扳始皇曾此望仙山白雲
翠壁還堪老浪說飛昇出世間

增**方文上霄峰詩**九峰信已奇上霄尤詭特壯哉秦漢
主不惜攀躋力吾聞太史公二十遊南國亦登此山
椒延頸眺八極嗟彼山下人終身莫能陟

上霄之水其一逕鐵船西北與石門澗水合其一西行
出白雲菴入金家坂

上霄之南有地高且平者爲仰天坪也

桑疏仰天坪者上霄峰南之平原也地在峰半其高
當峰三之二高且平謂之仰天平坪去漢陽峰可十
數里據坪而望上霄後擁若張翠帟漢陽前列若施
螺障諸峰駢羅向背遠近靡不悉備陰壑迅吹時發
林木應響如鐵騎數百大呼疾馳寒氣襲膚毛髮森
豎不復能久留矣

石花生仰天坪石上或青或白其狀如雲花而不葉
可用爲藥

仰天坪西南爲上下黃龍山又西南爲馬耳峰語皆
具圓通類中

增范初曰竹書紀年周康王南狩至廬山仰天坪有周
王城劉孝綽酌陸倕詩乍觀秦帝石復憇周王城是
也

坪有雲中寺寺北爲牯牛嶺

續志仰天坪有雲中寺萬曆間釋法忠號敬堂創興

之群峰四圍周匝完密風氣高寒視峰頂諸刹皆在
下矣

增但啓元仰天坪詩千尋鐵壁絕塵表上有玄猿疾於
鳥僧定閒敲清磬聲徘徊不覺楚天小

增熊文舉仰天坪詩至此天無上孤高佛更尊閑忙諸
長老興廢舊山門雲白歸何處燈青夢不昏何能生
羽翮一笑狎乾坤

寺東上爲蘆林林有五葉菴菴後有退居曰陸寓航

續志其壑平坦荻蘆成林故名五葉菴踞太乙峰背

取一花五葉而名菴航亦以蘆林而名稱廬山精舍
續志蘆林釋修遠號石照吉州人苦志出家博通三
藏遍扣諸方而後嗣法於若昧大師首注楞嚴正眼
華嚴法華金剛圓覺皆有疏唯識起信諸論皆有解
釋

增

釋溥淳五葉菴詩五葉菴深靜見聞高峰秀出許誰
群夜來月照滿林白半是蘆花半是雲

續志仰天坪西南爲上下黃龍山又西南爲馬耳峰
詳黃龍山圓通寺類中

蘆林之北爲含鄱嶺

續志含鄱嶺有月輪峰其陽有青蓮菴硃砂菴

牯牛嶺仁王寺

九奇峰東北爲牯牛嶺

桑疏嶺雄峻如人箕踞而睨重淵當其東山之名者
莫高於雞公石然嶺猶俯視之如兒孫然其北有石
如牛首故名

續潯陽記牯牛嶺石載土蓋咀山也隆然敦且厚

桑疏牯牛嶺北爲烏龍潭東林寺前水之源東北爲聖治蓮

花雙劍諸峰東爲屋脊嶺其說皆散見各類中

石劉劉世揚廬山最高處五大字旁有偃蓋松

石劉廬山正中處五大字在屋脊嶺

牯牛嶺之北爲小天池山

續志山頂有池春冬不溢不涸故名

其壑蒼松隱隱鐵瓦鱗罕者是名法海寺

續志法海寺即小天池寺明神宗時僧無染建

寺前有千佛岩楊岐洞

續志岩面楚江可登遠眺楊岐洞相傳楊岐禪師曾

居焉

續志寺傍有池方圓丈許泉清可鑑上有草亭

增釋溥淳詩客從松下來松色青眸子落檻楚天長霜

飛段段水 一坐其晨夕清泉人似之短垣門未設

秋晚荳花垂

寺後爲紫霄峰其東爲女兒城石船峰

續志女兒城乃一壑也女兒事無可攷紫霄峰有二

其一在匡南與漢陽上霄連此居其北

仁王寺

續志仁王寺未詳辨自何代據韻府所載仁王寺僧喜唱望江南曲亦莫知何許人也後出山主一刹未幾欲歸詩曰當初只欲轉頭銜轉得頭銜轉不堪何似仁王高閣上倚欄閑唱望江南寺久廢明神宗時僧碧潭自五臺來重興焉

仁王寺後有鼎石坐數十人北爲劉家砦

續志遊人登其石聳身萬仞湖口江山指諸掌矣仁王寺北有嶺橫亘如蒼龍脊指東而行脉奔九江其上有蛟溝窪避世岩

續志蛟溝山勢最險要其土皆砂石屢年屢崩久之其脉必斷

續志岩去蛟溝三里巨石層疊正踞嶺脊王思任曰避世岩俗呼爲躲雨岩

踰岩東行三里許有峰秀出者爲振衣峰左有岩曰鳳凰岩

續志振衣峰有曇花菴鳳凰岩俗謂之雞公石其下有雲中菴

前爲半月峰峰下有洞曰扶輦洞

續志峰形圓似半月故名俗謂團坡扶輦洞深廣可居多鹽鼠俗謂之鹽老鼠洞其下有觀音菴

振衣峰西北爲蓮花峰其中有蓮花洞漢陽峰之北爲樓臺峰又北爲黃龍山黃龍菴在焉

續志黃龍山有三其一在弔橋其一黃龍潭上山其一在隘口之南爲黃龍觀卽文女真跨黃龍昇仙處黃龍山隣上弔橋其中有般若菴

續志般若菴有僧徹天居焉得念佛法門年逾百歲下弔橋有蓮社居弔橋之上有高尖石

續志高尖石乃一峰也尖削峭麗人呼爲高尖石黃龍菴之下有石門蓮社石禪菴

增釋如愚龍潭菴對雨詩苔蘚空門外煙蘿夾逕陰春流一澗急寒雨數峰深鳥倦垂天翼雲遲過客心望中燈火起人語出孤岑

增劉肇國石門蓮社詩石門峻極石頭空一水淵淵萬壑通追昔虎溪千古意猶存香谷白蓮風

鈴岡嶺含鄱嶺

牯牛嶺東北爲屋脊嶺松光嶺東爲大麥社

語見各類中

牯牛嶺之南有地曰吳王砦

桑疏吳王砦者勝國兵亂時土人相與團結避兵處也吳王蓋其長云砦在牯牛嶺南地夷曠可藝粟數十百石然高寒不穫其東南卽鈴岡嶺

牯牛嶺東南有嶺橫亘虛空者鈴岡嶺也

續志其嶺極峻橫塞太虛其四維山勢雖高然猶俯視之其頂雖夏亦霜

續志嶺端有池曰金沙盆其泉夏不溢冬不涸雲居

崇愚大師廬此三臘一夕月夜經行失足踏空忽大悟至今垣石尚存鈴岡嶺半南崖有金蘭居

鈴岡嶺西南爲大月山

桑疏大月山在含鄱嶺東山特出不與他山聯其形如半月故名山之南直含鄱口若爲含鄱之屏蔽云月山東南爲五老峰語具五老峰類中

大月山東北有水東流出五老峰背下注爲三石泉有泉出大月山東逕硃砂峰背下流爲黃石港大月山南有溪南出含鄱口爲白水漕

桑疏溪無泉源積雨成流

大月山西南有山雄雄橫亘曰含鄱嶺嶺之北有新菴
增王世懋度含鄱嶺詩蒼虬絳節度崢嶸下界微茫勺
水明最愛他山雲似絮不知身在絮中行 山鎖平
湖日鎖煙籃輿時在碧空懸捫巒正似都無地度嶺
還疑別有天

增熊文舉下含鄱嶺詩高空四望樹如薺忽見寒流似
雪溪萬色杳冥難指點百靈孤削絕攀躋人從碧漢
中天下家在青原大壑西曾是遠公蓮社客病軀扶

杖續前題

增方文含鄱嶺至太乙峰詩侵晨獨出含鄱口千里鄱
湖一嶺函但使短藤窮碧巘何妨細雨濕青衫林中
黯澹高低樹霧裏微茫來去帆不是探奇索隱者誰
能踏雪上巉巖

桑疏含鄱嶺者九奇峰東第一峰也以含鄱口故別
出山橫亘燁燁如火又如猛士乘馬而馳勢甚壯偉
嶺東南中豁爲含鄱口

新菴在含鄱嶺北大谷中

含鄱嶺水北流逕神龍宮入石門礮

含鄱嶺下有泉曰沒泉泉東北流入於月山南之大溪

含鄱嶺西南為香山香山寺

桑疏香山渡溪而東即犁頭尖香山之南即桃林山

語皆具山南含鄱口類中

續志香山寺以白樂天得名相傳樂天居此事無可

攷或云因近香爐峰而名耳

續志寺有瀑布瀑布西有小瀑布香山水逕簡寂觀

出湖

李頎宿香山寺石樓詩夜宿翠微半高樓聞暗泉漁

舟帶遠火山磬發孤煙衣拂雲松外門清河漢邊峰

巒依枕席世界接人天藹藹花出霧輝輝星映川東

林曙鷺滿惆悵欲言還

香山西北為田壠

桑疏田壠與仰天坪近小山也其地平衍可藝穀三

數石往南康人常田於其所然高寒不獲又多豬鹿

猴獾之擾人力莫能制事遂已今其地猶有田塍焉

地多瀆泉四時不竭

小漢陽峰大漢陽峰

田壠之南爲小漢陽峰

桑疏小漢陽峰在仰天坪南山峻特雖不及大漢陽之壯偉而尖削過之土人謂之尖山其西南卽馬耳峰

其東有豆葉坪

桑疏豆葉坪在小漢陽峰東半山地饒山豆山南人常採其葉食之又有瀆泉四時不竭如田壠

桑疏小漢陽之南有廢址焉竹叢生之士人曰竹林

寺基也風雨中鐘梵聲在是

其傍有竹影寺明慧燈禪師建

王應熊傳畧慧燈禪師產於郟城南至普陀皈依大智和尚叅學事畢乃登廬山就竹影宴坐所居雖僧侶亦所不到有採藥者信步深入遙望把茅蓋處一僧跌坐如土塑人室中無所有覓火竟不得採藥者返道其事山中始知有燈公亦大異矣哉師名海龍生嘉靖丙辰歿崇禎庚辰云

桑疏長壠在豆葉坪東南桃林漢陽兩山山峽也仰

天坪有水經桃林之西循長壠而下曰桃林澗
小漢陽之南爲大漢陽峰

桑疏大漢陽峰者廬頂南之大嶺也南康人謂之漢
王包九江人謂之漢王坡其上有峰南康志謂之漢
陽峰今從志廬頂惟此最高大東放乎桃林萬壽寺
而迄乎康王谷語廬頂之峻偉宏壯者必歸焉其巔
平曠無喬木下視濛濛窈不見底雖六月亦寒慄或
曰洪水稽天時漢王避此峰廬山皆漫此峰不沒夫
洪水莫大於堯然其時無漢王也書稱下者爲巢上

者爲營窟烏有所謂廬山皆漫者哉藉第令皆漫天
下當悉爲海寧復有遺民耶漢王蓋方言漢陽之訛
云或曰漢陽之上有螺蚌田何也曰固也**述異記**桓
冲爲江州刺史遣人周行廬山冀覩靈異旣陟崇巘
有一湖匝生桑樹中有大群白鵝有敗扁赤鱗魚使
人渴欲往飲赤鱗張鬣向之遂不敢飲**列仙傳**湖廣
數頃黿鼉盈其中**周景式廬山記**山頂窮湖足頰尾
鯉鬣鱖皆傷**剝潯陽記**廬山頂上有池水池中有三
石雁霜落則飛於山北**李太白送姪嵩遊廬山序**上

有方湖石井夫此乃所以有螺蚌之甲歟

漢陽之北地多峻級側疊而上曰樓臺其下卽烏龍潭語具康陽坂類中

漢陽之南有紫霄鶴鳴諸峰語具歸宗開先諸類中

續志漢陽峰麓有松隱菴僧石琳隱處石琳名寂玉初師慧燈後叅天童又叅磬山歸隱漢陽峰下三十載

漢陽峰有峭壁曰禹王崖

續志相傳禹王治水時登此故名

漢陽峰北有巨石焉呼爲天鏡石其下有袈裟泉

續志天鏡石大而且圓平而且光仰天直照故名又曰卽曬穀石爲匡廬絕頂明釋了宗建寺額匡頂寺板屋崖牆制頗瑰瑋寺東袈裟泉師造寺厨汲甚艱夜坐其處持大悲咒七夕輒放異光泉忽涌出濺濕袈裟故名天鏡石西下爲烏龍潭白雲菴烏龍潭凡數處

漢陽之支西行長嶺橫亘如鰲脊然遊者莫能至山勢森森直接紫霄其中有黃鶯岩

續志黃鶯若四圍峰勢羅列中開梵刹修竹茂林誠嘉遁之地也樵人直說此爲昔人避國亂之處

續志漢陽之西南有香爐峰匡山香爐峰有三此在匡南亦俊偉奇特也

續志李青蓮書臺其陽有日照菴取太白之詩而名也

續志日照菴下爲龍泉嶺嶺有聽松菴在簡寂觀後漢陽之南巖爲黃巖

續志黃崑一洞也紆回而上層疊者三皆神工鬼斧

天然造出按此地爲赤眼禪師初闢其下有筵石廬若昧智明大師塔事見開先寺類

桑喬曰九奇峰惟九江新志在天池寺而僧洪金所指形勢似爲得之諸他僧言皆乖謬無定論不足考憑元李洞以九疊屏爲九奇峰而一統志與九江府舊志亦云九奇峰在廬山東南亦謂之九疊雲屏與金所言皆不合因採錄以廣異聞



